

續修益田縣志

一
函
六冊

續修藍田縣志卷十九

叙傳

禹貢雍州貢球琳琅玕或以爲卽藍田之玉也是藍田於上古爲隩區矣炎漢以來志雍州者必及藍田如黃圖決錄秦書秦記關中記西京記雍錄雍勝錄長安志長安圖志諸書其存者不下數十種無有遺藍田者蓋藍田以下邑而足重於雍州也如此然皆非專志藍田也前代宏治中知縣任君文獻始創爲藍田縣志萬歷中沈君國華重修之其書皆不存僅見於本朝順治時郭顯賢續修序中郭君以順治十六年宰是縣與縣人周良翰等同修縣志其序曰余聞之上古結繩之風旣邈而書契遂興厥後著述漸繁而經史繼之矣故左史記事右史記言下至晚近裨官野史雜說亦各紛紛紀載將以垂志不朽也矧縣志爲國家著述之要用以稽古而證今者乎是以縣之志在在有之藍邑爲秦地僻壤騷人韻士遑遑皆托足焉其俗尙樸其氣多抗三古之風猶存若稱雋於文壇者寥寥數人而已故百年以來從無振奮於天衢者豈天獨吝此一方乎亦由人文之率不先而凋弊遂至於此也其於不朽事業誰起而繼之耶獨吾清朝御極百度維新人文丕變俗尙士風駸駸大有起色於是百年名世遂應運而興矣殆亦元會運數之否極而泰來者也余於己亥八月秋單騎就邑晉見山水之秀風俗之雅大慰昔之想第以簿書

猥瑣不得與間雲野鶴同作飛觀惟詢之高賢訪之耆老僅識某里某鎮爲本邑之疆圉某山某川爲本邑之瞻望終屬孱索未能扶筇蹠屐使佳山勝水燦若列眉判若指掌也會許茶臺有通修秦省之舉檄取續志余躬親鄉先生與諸君子酌議但求之舊志久已湮沒而無遺使博古者無所徵而握管者靡所藉矣於庚子春掃間軒於張氏藝圃其間名花異卉之植干霄蔽日之枝紆迴曲折之致亦足以發人幽趣動人逸興者爰質之一二同志相與朝夕晤言搜訪群籍研精汰濁斥陳引新與夫名勝之奇觀高賢之芳躅悉爲拈補而圖繪焉余向之醉心於藍水玉山者披覽一過捫卷巡思恍若桃源乍歸華胥初覺雲山草樹都堪記憶也茲特授之剞劂集爲四卷傳之當世皆曰藍誌蓋令可傳者不致遺珠而可畧者無容濶璞雖不得與大人先生金鈎玉勒媲美芳踪而亦大有益於國計者耳後之續是編者或得與史貢職方並垂不朽哉然爲之考較而續述者楊君衷樸周君定侯也相與咨訪取裁則張子文運文進我穎博學謝子家駒孫子一鵬諸生也余則總其大概云周君叙曰邑有志如國有史也地理則誌風物則誌政事沿革則誌歷世忠孝節義則誌昆蟲草木凡可以適用者事雖細則又誌蓋大之等其圖於遷亳營洛小之備其理於山經水注上以考治而下以維俗誌之作也顧不重哉是以前人有志於斯者極意經營而恐其不可信可信矣復恐其不能遍及於世於是本乎身之所履目之所見耳之所聞藏書之所

紀載長老之所誦說博訪之互訂之需之歲月始獲完集然後登之於板以代筆墨所不周而又懼後此莫繼終歸於盡往往以纂述之事更俟諸後之君子作者之慮蓋若斯其深且遠也使處其後者享其逸不念其勞任其或存或亡而闕殘不理不亦守者之過歟卽如藍之名始於秦漢隸京兆晉城之至後魏而更爲郡此後又幾變迨貞觀三年仍爲縣元明迄今未有改也而邑之有志宏治中始自任公同其事者實雙溪輞川兩榮先生爲著萬歷年間復修於沈公而邑之縉紳大夫與其多聞之士又復有勞自宏治至萬歷百餘年而誌凡兩易自萬歷及今歷代二懸年六十其間輟聞謄事一無所續列猶可言也而且前所爲遞相著述者漸爲泯沒可勝悼哉余嘗遊名山大川所過都邑一切風景人物可寄賞慕每憑弔之不能去云况生長斯土感懷愈切卽不敢謬附作者之林而又奈令古今名勝煌煌典冊至此而竟任其湮沒不彰也已亥北歸搜遺書訪諸故老家僅得舊志數葉浹日月而集之有出一二副者有一半副者重則去缺則補失次則序終祇乎其不能無闕遺之憂矣迺邑侯天孫郭公自下車卽懸然以邑誌爲念蓋亦同慨古道之失傳而往集之難覲也越明年春日於張子藝圃偕衷樸楊君復問愚並屬愚共修愚謝不敏歸而撥篋中所蓄與張子文運文進謝子家駒張子博學孫子一鵬次以應抑以此求不失作者之志乎若夫編其集新其制易俸以貢其梓人令前美重光於星日後芳共昭於雲漢繼太史之遺

而應採風者之所求則固吾邑侯郭公事也郭侯之書今亦不存其序二編載在雍正中增修縣志內增修者清豐李侯元昇也書凡四卷分十六目李君自叙曰余僻居頓邱固陋寡聞舉凡名山之勝大川之廣復未一寓目閱歷於乙巳歲奉命來藍抵孟津見黃河之曲折過函谷觀華嶽之巍峨不禁低徊者久之緣到任期迫每以未獲遊觀爲恨未幾入藍境界見夫玉山兩峯競秀直與華嶽並其崔巍灑水一脈常流堪與黃河同其浩蕩白鹿之勝蹟已往而叢木繁陰嘉禾滿目猶有繡嶺之休風輞川之故址無存而田飛白鸞樹鸛黃鸝不減唐人之雅韻以至高巖滴露野花出香眞令人如歷山陰道中也因思山明水秀必有達人哲士挺生其間爰取誌而披覽之其間名垂竹帛功著史冊者固代有偉人卽草野之中型仁講義節孝堪傳者亦指不勝屈余不禁喟然嘆曰地靈人傑亶其然乎奈此誌之修至順治庚子而止由庚子至今已七十餘年矣而此七十餘年中豈無功業可傳懿行可法者及今不修設一旦老成凋謝史冊無存則此七十年之忠臣孝子義夫節婦必且泯沒於荒烟蔓草中可勝悼哉余於是急欲增修而補葺之夫何逆虜蠡勳西陲辦理軍需孔亟兼以簿書鞅掌日無餘晷遂有志而未逮茲於龍飛之八年我皇上表章懿行加意搜羅命修一統通志而三秦各憲大人仰體聖心開館纂修噫各憲大人當軍興旁午之際尙不憚表微闡幽之勞予小臣守茲百里詎敢辭修廢補缺之瘁哉藍誌增修實余之責也

夫實余之責也夫邇同宗之明經諱大捷字月三者自關西來今於道故之暇酌酒共商月三氏告余曰
否否邑之有誌猶國之有史也史必核其實誌豈可徒循其名乎必博採故老訪詢輿評而後其行爲有
據其事爲足徵固不徒以文詞見長也必令邑之縉紳先生謀之而後可予曰唯唯遂詣邑之縉紳周君
琬孝廉張君士淳王君有翼明經韋君益溥以及文學之士若孫子乃駒周子盛嗣王子于京與之共相
商榷而諸君子亦與余同心或訪之故老或詢之輿情旁搜記載不辭風雨之勞廣求懿行竭盡心志之
苦舉凡七十餘年之皇恩惠澤賦稅之酌盈劑虛以及縣治中之或創或因無不一一而畢具焉豈曰余
敢妄作以自取罪戾哉正以仰我聖天子表彰至意各憲臺開館盛心更望後之君子接踵其事遺者補
之新者序之共成一邑之典籍以相傳於不墜云爾時雍正八年七月也閱五十餘年至乾隆五十四年
仁和高侯昱與邑人士更葺之書成未梓嘉慶元年遷安馬侯學賜益以後數年事爲之付刊馬君叙之
曰余以草茅新進荷蒙聖恩遽膺民社惟是謹守儒素勉勩勤散輿出作入息之侶共安耕田鑿井之
常以仰副聖天子子惠元元之意於萬一云爾豈敢妄言考求典則博徵文獻哉迺前官高公昱以蒞任
八載政治優閒因與邑之人士修葺舊志卷帙已成付梓未就而去迄余到任中間已歷兩官甲寅之春
余來於此與茲事者以續刊屬余今志已成矣比較舊志刪節繁蕪而於忠孝節義仕宦科名爲特備尤

足垂信後來而動人以爲善之心於風土民情大有裨益非徒以考山川矜物產集文藻見長也余讀至記載長史名姓處尤不禁蹙然有感曰嗟乎可不慎哉其平庸無善惡者記其姓名鄉貫而已無論矣其賢者則必誌其下曰其賢何如未賢者竟誌其下曰某事某事爲人所不足詞雖不甚而貶刺之意較然可睹使余少有不慎而爲後之修者著一二言於下豈不貽羞於來禩耶此余所展卷而不敢不惕然者也自高公既修之後數年間事謹與邑人按實補之其贊修人姓名亦並補列以爲後來急公事者勸焉曰貢生王君開沃曰敎諭王君志灝曰訓導司君康曰典史范君世棠曰把總黃君天祿曰玉山書院山長王君芾曰侯選訓導王君有造馬志今猶存前此則絕無可考也至道光十四年二月新建胡元煥來知是縣距馬君時又四十餘年矣政典之因革官師之量移戶口之興耗風俗之盛衰與凡忠孝節義潛幽待闡者均宜登諸簡策昭茲來許又自嘉慶初敎匪猖獗巢窟南山官軍搜勦藍田當其首塗儲峙芻藁日不暇給瘡痍之形久而始復握政柄者因時斟酌以與休息志乘之修尤在所重昔朱子知南康軍下車之日卽問志事職是故也顧元煥之蒞任也一年賑水災二年捕蝗蝻三年籌義倉四年修城郭牽率補苴不遑自逸亦嘗咨於耆長詢及芻蕘縉紳儒林共相商榷因前志之舊章準三史之正例網羅放失彌縫闕文又得友人固始蔣君爲之訂正於茲兩載始有成書爲二十四篇凡十六卷圖十表四志六

傳四更芟前志之繁別編文徵錄以與正志相輔爲之叙曰

藍次於璆名地之寶英英在田華離是表續嶺右明武關左曉谷阻原重鶉居無擾述縣境全圖第一

曉柳青泥城名幾變以固秦喉金甌斯奠述縣城圖第二

唐鄉廿二宋餘其四表畷分疆今猶古制述二十里圖第三

山豈丁開里非亥步卅無野廬誰達道路述道里圖第四

山林之民毛而方毛物阜物難可量支分幹別觀陰陽異俗異制隨施張述縣境諸山圖第五

潛廬洞出濃瀟漆名誤灞源失漾鱗雲行紆譎述縣境諸水圖第六

盡力溝洫匠人是掌蘭臺令史志名所仿汨汨瀾瀾在山泉清疏之淪之以利我氓述水利圖第七

掌舍失職公靡誰整泐泐琴聲詎傳舍等我思召棠書以自警述縣署圖第八

宋碑記修未詳肇建緝維唐畿始美輪奐聖清造士郁郁而煥述學宮圖第九

鹿洞鵝湖庠序之佐追琢其璋光富於火述玉山書院圖第十

求黃求赤地平是主經度出線高弧正午元公測洛其圭曰土辨方授時以爲政祖最爾微封昏旦可譜

述地平高弧表第一

龍門作表周譜是程建康志地年月互經大事必書不遺五行述紀事沿革表第二

漢志百官唐表宰相宋始專書官儀簿狀吏酷吏循民歌民忘藍有青石難掩譽謗述職官表第三
登科著記厥惟李洪姚樂繼錄科第愈隆順風而舉慶茲飛鴻述選舉表第四

昀昀原隰斥斥墳衍垌北既經古懷非淺孝侯采風光宗志墓文獻足徵逸聞無誤述土地志第一
兩稅且亡况租庸調條鞭法行今亦非暴杜佑通典王溥會要參諸計簿錄兩皆校述田賦志第二
社稷人民宰官所事敬而不媚是曰務義述祠祀志第三

鎬京在鄰鐘鼓云遙培菁植械巍我聖朝述學校志第四

官司失守爰有七畧師法既亡四部乃托條辨源流同異昭灼方志誤收其名始鑿正以群籍庶備著作
述藝文志第五

靈谷可田金石何壽左右采獲以資考究述金石志第六

山蟲終南亦生臺祀官曰親民誰爲父母無父何怙無母何恃錄此數公告諸君子述循吏傳第一
含金孕玉山川精琅琅英峙神挺生惜哉兩漢人失名述列傳第二

事父事君遠邇無間寥寥數人光燭天漢述忠孝傳第三

漢重家法經師爲儒宋重理學儒與漢殊均之守道孔門之徒述儒林傳第四

棲真靈澹容與彤聊浪情延佇輞之濱盡之下灑清風裔裔雨述寓公傳第五

釋老名志魏收被晒元奘在唐方技斯準九流就湮宗風亦隕述方技傳第六

松筠不老女貞不枯揚徽彤管金石弗渝述列女傳第七

小吏外吏志各不同春秋國語體詎相蒙圖經法亡方志例缺推本前賢正諸來哲述叙傳第八

謹按叙傳義例上祖史遷本胡令元瑛之所作也歷叙以前修志本末而以所作繼之并詳叙所以纂輯之意爲叙傳一篇洋洋乎大觀矣呂志就其原本稍加增益凡例一仍其舊爲其體例之善不可改也今敬錄凡例全文以存其朔而以呂序終之用不沒前人之苦心至此大所續修則別叙緣起及其義例列之篇端以從近今通例不敢學步效顰取笑大方也

附胡令凡例二十三條有序

關中名志有入而武功朝邑爲尤著尊之者直欲擬諸馬班貶之者又力詆其蕪穢皆未免稍過也南宋以來圖經之法久失俗下志乘庸陋蕪雜康韓二君起而矯之叙次雅潔是其所長破壞體例是其所短不得以約省篇卷遂足以俯視一切矣夫州縣方志于古屬外史所掌其在史部也屬地理門圖經者地

理門中之一種也方志之例宜以圖經爲主而參用史法俾紀綱法度與凡忠孝節義之行無不燦然畢具爾雅于古潤澤于今圖表志傳四者缺一不可夫然後可爲信史哉藍田前志重修于乾隆之季雜而多越今整齊其次俾歸條理先爲發凡以引覽者

藍田志存者有雍正八年之李志嘉慶元年之馬志馬志中按語多稱舊志即李志也志於馬志按語之可存者存之直稱馬志以別於馬志之稱李志爲舊志

無本之說不可以示後凡所徵引皆標出處或有訛誤後人得辨而正之

方志以地理爲主地理以圖爲主前志卷首載縣治一圖畧具形似非地理家法也今志仿圖經例以圖冠首別爲一卷

縣境錯入鄰域參差不齊有長方勾股圭形等勢惟開方之法足以明之故於縣境全圖二十里圖諸山圖道里圖皆用開方水勢曲折歷澗而注非開方所能盡故諸水圖不用

建置作圖者三輔黃圖洛陽宮殿圖例也縣署爲出治之所學宮書院爲敷教之地三者之外餘皆不圖圖必有注昉於大易之繫辭也鄭樵謂辭以繫名蓋繫於易象之後即圖注之所由起春秋公羊家言比事屬詞屬詞亦繫辭之義春秋無圖而有譜太史公書歷引周譜譜與圖名異實同故屬詞卽周譜之圖

注也三輔黃圖遁甲開山圖諸書久亡其散見於唐宋人所引者皆當日之圖注故今志圖後之注雖創實因藍田爲秦楚咽喉自古戎馬所必經之地營汛驛鋪在所必詳今於縣境全圖內列清而注中更明之

前志首載天文循俗例也並填星掩鉞熒惑入東井二事以爲藍田徵應似矣然占法統言在秦不言在藍田因桓溫破符健沈田子破姚泓皆在藍田遂謂二星專主藍田可乎今一概從刪特作地平高弧表以明授時之準

前志沿革紀事分二門雜記中又散著大事非例也今以年經月緯之法合爲一表庶覽者挈然職官選舉前志但錄履歷非傳非表大類花名卯冊茲特更正其有事可紀者入循吏列傳無事者入表以存其名

山川有圖復入土地志者縣境山川皆有名於古見於史與各地理家書圖只能辨方位不能溯古蹟也土人所呼之名於古不合志中叙次一主俗名而以古名證注其下蓋流俗沿訛不自今始專列古名反滋疑怪矣

秦嶺大幹自西而東餘脈散爲諸原自南而北縣境水皆北流群山夾之而趨所謂兩山之間必有川也

觀川勢即知山脈雖當圖注亦可

古蹟風土等自來志乘皆各自爲門今皆統諸土地志以省繁冗

輞川名勝最多今以前歲已作輞川專志將附諸縣志後故今志古蹟等但列其名而不詳叙以勉重複
功令賦役全書十年一修因革損益不盡與舊同也道光十九年賦役全書初成故志田賦全采之不厭
其詳

學宮書院皆有圖復作學校志者造士之方圖難盡載彙爲一志以昭鄭重

古者學與廟分有事則祀先聖先師於學而已元明以來學與廟合至今已成定制呂涇野志高陵喬三
石志耀入文廟於祠祀不入於學校意在存古不自知其違今也今志於文廟有學宮圖卽以建置爲圖
注而學校志但載規制庶于古今兩不戾寺觀本宜入土地志今以類相從附祠祀後

藝文金石前志所無不憚搜羅以補其缺

前志于各傳分門太多且有毫無實事而以雷同之言類乎考語亦爲一傳者皆不合例今使各以類附
不入傳亦不沒其名

前志以蘇晉榮察入藝苑傳非也今改入列傳韓幹施璘兩人占藝苑一門不成篇目故亦入列傳

前志方伎只趙胡一人不成篇目亦無可從之類而雜記中所載有名僧道甚多不入正志亦非例也考前史如佛圖澄鳩摩羅什元奘張果林靈素之流皆入方伎傳較魏書之釋老志元史之釋老傳尤爲得體今志遂從此例

節孝婦已蒙旌表者全入列女傳其未旌而已合例者近人修咸寧長安二志皆備載之窮鄉僻壤苦節能甘無力上達遂致湮沒是採訪者之責也俟核其眞確以次續入

前志徵引甚博凡涉縣事雖稗官野語無不羅載今一一刊止以明史例特成書甚速不無罅漏大雅君子匡其不逮幸甚幸甚

胡志始於道光十四年訖十九年厥後三十餘年當光緒初元陽湖呂令又續修之序曰古者列國皆有史官掌記時事匪直爲書美惡旌褒貶已也人閱人而成世凡其政理謠俗與夫人材之消長物產之盈虛靡不筆之於冊所以成一國之掌故而上繼往昔下開來今也自秦罷封建而置郡縣郡縣之職其事且久不能埒古諸侯又例不得立史官而其撫百里之封膺社稷民人之寄論者謂實與古列國相等則夫後世府縣之有志非即古者記時事之意乎藍田縣志修於道光十九年新建胡令元煥自時厥後中更四朝歷年四十可記之事指不勝屈又自同治初元粵逆回匪更迭蹂躪藍邑東西北三鄉罹禍尤酷

室廬焚蕩戶口凋殘而一時膺鋒刃赴鼎鑊視死如歸之士女尤多深明大義足彰國家風教之盛者使不迨今編輯或放軼而無聞或訛舛而不信是誰之過歟余承乏斯土六易寒暑大懼繼往開來之任墮於我躬是用與都人士商榷重修適農書袁君廷俊讀禮家居道合志同慨然身肩其責又復博延才學李孝廉甲王廣文之增李廣文時雍相與鉤考舊聞網羅近事焚膏繼晷不踰年而告厥成焉自道光十九年以前守舊志而遵循之道光十九年以後續新志而附益之卷帙此第條例先後一仍其故譬彼承家舊志垂爲典章而新志奉爲約束者也譬彼行遠舊志導夫先路而新志步夫後塵者也袁君生長鄉邦諳練故實病夫瀰漭各源舊說輻輳已乃徒步裹糧蹇裳披莽由委窮源而正之昔人云百聞不如一見此尤足信今傳後補前志之未詳也余不敏幸藉諸賢之力坐使數十年之逸事及身而蒐輯完備俾後之蒞斯土者展卷瞭然不至有前無可繼之歎是則余之心亦以少慰也夫遂序而刊之

謹按舊志之僅存者前有馬志四冊後則呂志六冊而已然乙亥至今又六十年矣濂以淺陋之材承賢達之後大盛之下何以爲繼續貂畫虎祇增慙慙而已

附誌續修藍田縣志始末

此次續修邑志自辛酉後屢有斯議未克實現庚午秋縣長范慕庭始聘 藍川先生纂修旋范卸任繼之者曹縣長漢英辛未二月始成立志局然以無經費不能從事夏五月 先生以志成恐難合時代性辭聘書南多方勸懇始蒙俯允經羅縣長錦再奉聘書於冬十二月王縣長文伯始撥經費得開辦初南代表范縣長意來懇 先生先生初不允繼謂必南襄助而後可先後縣長又均相強辭弗獲遂隨王君海珊後而濫芋焉又以經費艱難採訪只任三人知不能周詳仿報館投稿法定酬金出公啓專函請合邑人士投採稿冀收費少功倍之益乃至再至三終屬寥寥翌春停止經費許以義務成編以繕寫乏人致稽時日王海珊躬履四境考查水利因勞致疾竟至不起去春縣長郝助紙墨繕寫費將成編而 先生適遘病纏綿年餘仍不能握管以上憲催志急不可再延謹就初成者交印恐未詳盡願讀者諒焉邵澤南謹識

